



Fasnacht 2015

Sujet: **Kunschtszene Prattele**

Sit Monate wer het`s nit scho gmerkt
 git`s in Prattele öbis verstärkt
 nei nit dr Gstank vom Rhy
 dä isch jo sowieso gli verby
 mir dänke ane spezielle Dunscht
 hejo mir meine d`Prattler **Kunscht**.

D` **Kunschtszene** in Prattele isch grandios
 sie liegt buechstäblich uf dr Stross
 drum brichte mir für euch es bitz
 über dr gröschti Prattler-Witz
 ob im Erli, im Dorf oder in dr Längi unte
 überall hän mir die **Kunschtfehler** gfunde
 frühner hesch gmolt in dr Höhli
 hüt uf dr Stross wie e Löli.
 Wobi so Strossemole isch pikant
 vormene Gartetürli au riskant
 au nachere Kurve isch`s nit schlaue
 was denn passiert weisch jo genau
 denn knallsch in d'Auto ziemlich vieli
 egal ob Hans, Fritz oder dr Willy.
 Oder es Bögli links, es Bögli rächts
 s`Gliche nomol das isch nüt schlächts
 das isch kei Slalom in St.Pölte oder Wänge
 so fahrsch zum dich ins Migros abezwänge.
 E Tip, tüent die Parkplätz würklich au nutze
 weisch nie wenn sie die wieder wegputze
 will markiere und wegmache isch im Trend
 oder sie wüsse nit was sie wänd.

Aber s` Allerbescht jetzt wird's no wilder
 sind die tolle Strosseschilder
 bis zu drei Symbol uf einere Site
 s`Glich in grau hindedra, aber bitte!
 In jedem Strössli mindestens eins ungefähr

stönd die überall chrüz und quer
dr schönsti Platz mir finde dä top
isch dä vorem Copy- Shop
was uns dra am beschte gfallt
sicher mindeschtens vier si dört scho ine knallt

Au unseri Kreisel sind e **Kunscht**
chasch sie aluege ganz umsunsch
dä bi dr Autobahn mit Liechterspiel
fascht wie e Disco s`fehlt nümme viel
oder dä bim Strübin ohni Töpf
drfür mit dä verschiede farbige Chöpf
dä bim Aquabasilea mit dr Chugele drin
oder s`Flugzügrad het das e Sinn ?
Au dr Neuschti mitem` Rad dr Zit`
jojo d`Prattler **Kunscht** isch fit.

Händ dir scho die **kunschtvolle** Chäschte gseh?
Die sind glaub do zum Geld ine
stönd überall umme massewis
irgendwie finde mir das mies
willsch zahle gisch di Autonummere i
und scho isch dr Zahlvorgang verby
dumm am Ganze wenn er numme s`BL frisst
und d`Zahle speichere eifach vergisst.

Zum Bilder aluege isch de Wäg uf Rieche verby
den Prattele het jetzt e eigeni Kunschtgalerie
scho de Name "Cafè & Bar Beyeler Collection"
tönt nach **Kunscht** und nit nach Action
mir wänd im Hermann Alexander Beyeler danke
das er uns so öbis tolls tuet schänke
au für d`Familie Friedli tuet`s rentiere
händ sich neu chönne organisiere
d`Sonja betreut dört Gäscht ob allei oder in Grüppli
dr Peter kocht am Banntag witer si Gerstesüpli.

D`Schwobe händ d`Bundeskanzlere Merkel
mir in Prattele en Platz mit Mergel
d`**Kunscht** an dem Ort ganz ohni Spass
es wird grünen und es wachst Gras
doch uf dem Bode cha nüt cho das isch bewiese
muess jo au nit, es isch jo au e Magerwiese.

Au e **Kunscht** isch es im richtige Moment z`höre
so het mes usem Komitee chönne ghöre
die beide Pensionäre Antonia und Hampe
möchte komiteetechnisch chürzer trampe
vielleicht seht me gli dr Hampe wie er Bilder molt
als Motiv s`Antonia wo mitem Rollator ummerollt
uf jede Fall wänd mir s`nit unterlo
und euch ohni es grosses Danke lo go
für uns heisst`s no es paar Jöörli Dorfplatzrueche

mir möchte uns witerhin in dr **Fasnachtskunscht** versueche.